

# 5 Famili Fuchs

T./M.: Felix Gisler 04.2013

„Selled miär äs Huän gu stäälä?“,  
fragt dr jungi Fuchs syy Vater,  
„wenn vu denä eis tuät fäälä,  
fallt das gwiss nit uff im Gatter!“

Doch dr alti Fuchs isch schlau,  
hett mit Stäälä viel Erfaarig  
und seid: „Sohn, jetz los genäu,  
suäch dr doch än andri Naarig!“

„Gang Du zerscht gu Fäldmüüs jaagä,  
schnapp im Teich ä chlyynä Fisch,  
Obscht und Ggmias fillt äu dr Maagä,  
pack ä Frosch, wo z'langsam isch,

aber chumm mer nit mit Hiäner  
us-em Puur syy Hiänerstall,  
denn, das weiss ich nu vu friäner,  
das isch ganz än andrä Fall:

Das sind Gfaarä-Dimensionä“,  
seid dr Papa - und meint's guät -  
„wo sich Stäälä nit tuät loonä,  
da bruuchts mee als libermuät.“

Doch dr Jungi will plagiärä,  
kännt bi Gfaarä keini Gränzä,  
und är tuät nit lang studiärä,  
wott mit Heldätatä glänzä.

Und drum mag är nimmä gwartä,  
schlyycht drvo am glyychä Tag,  
rännt dur d'Fälder bis zum Gartä,  
gseet äm Puur syy Hiänerhag.

Doch wo-n är wott neecher zuächä,  
chnurrt dr Wachhund furchtbar bös,  
und dr Puur faat afä fluächä,  
d'Hiäner flattered nervös.

„Hui, jetz fahrt dr Schreck i d'Gliider,  
und ganz zittrig uf dä Bei  
cheert dr Fuchs um und wott wider  
möglichsch rasch und lyslig hei.

Glyy druff abbä gheert mä's poolä  
und dr Fuchs het syyini Not,  
dr Puur isch schnell gu d'Flintä hoolä,  
schiässt wiä wild ä Laadig Schrot.

S'isch nu einisch guät ussgangä,  
s'het ihm nur um d'Oorä pffiffä,  
aber das tuät voorig langä  
und är het ganz schnell begriffä:

Hiänder wärded sträng bewacht,  
da riskiärsch du Chopf und Chraagä -  
und ä so-n-äs Huän zum Znacht  
verdirbt diär sowieso dr Maagä!

„Schmeckt's hiä nit ä Bitz nach Blyy?“,  
fragt d'Mamma Fuchs und cha's chuüm fassä:  
„Jungä, säg, isch eppis gsyy?“ -  
„Nei, ich schwör's, ich ha kei blassä!“

Will's ä bsunderä Fäschttag isch,  
mag keinä vu dä Füchs me wartä  
und si sitzed all a Tisch -  
dr Papa bringt än Äntä-Bratä.

Tra tru trab dub da, di dab dib da, di dab dub da.  
Tra tru trab dub da, di dab dib dab dub da.